

فريق التفريغ بموقع الطريق إلى الله

يقدم

من سلسلة **افتح لي قلبك**

يا تارك الزكاة

(باللهجة المصرية)



لفضيلة الشيخ: حازم شومان

رابط المادة: <https://way2allah.com/khotab-item-27711.htm>

السلام عليكم ورحمة الله وبركاته

الحمد لله حمدًا كثيرًا طيبًا مباركًا فيه غير مكفي ولا مكفور ولا مودع ولا مستغنى عنه ربنا، غير مكفي.. عمري ما هأكافي نعمك أبدًا يا رب، ولا مكفور.. عمري ما هأجحد بآلاتك يا رب، غير مكفي ولا مكفور ولا مودع.. عمري ما هأسيب طريقك أبدًا يا رب، ولا مودع ولا مستغنى عنه ربنا، عمري ما هأستغنى عنك أبدًا يا رب ولا هأسيب بابك أبدًا يا رب.

أدعية جميلة أوي يا جماعة أدعية النبي - عليه الصلاة والسلام - خير من عطر آذان الكون كله بالثناء على الله سبحانه وتعالى ليلًا ونهارًا، كان بيثني على الله ليل ونهار وبعد كل الثناء ده يقول لربنا لا أحصي ثناء عليك، هأقول إيه يا رب كل اللي أقدر أقوله، كل اللي لسان البشر يقدر يعبر عنه فقلته وكل ده لا أحصي ثناء، لا أحصي ثناءً عليك أنت كما أثنيت على نفسك، اللهم صلّ على خير البشر، اللهم صلّ على حبيب قلوبنا وطبيب قلوبنا وشفيعنا يوم العرض عليك سيدنا محمد عليه الصلاة والسلام.

إمتي يا جماعة هنقابل حبيب الله محمد - صلى الله عليه وسلم - عشان نفتح له قلوبنا، عشان نبوس إديه ورجليه - عليه الصلاة والسلام - عشان ياخذنا في حصنه، عشان نحضن النبي - عليه الصلاة والسلام - إمتي هنقابل حبيب الله - صلى الله عليه وسلم -.

افتح لي قلبك، افتحي قلبك، يعني بمناسبة هذه العملية الجراحية السلمية عملية افتح لي قلبك بإذن الله سبحانه وتعالى، اللي المقصد بتاعها نفتح قلوبنا عشان يتطهر ما فيها ويخرج أي شهوات أو أي أمراض أو أي شبهات فيها.

إحنا مش مخيّرين نشيل الدين والآ لأ

إخواني في الله الواحد بيزعق بس بيزعق ليه يا جماعة؟ الواحد بيزعق لأنه بيخاف عليكم لأنه غاير على دينه، لما نسمع النهارده إن اليهود عليهم لعنة الله اليهود ببيجوا في أماكن فيها قبور صحابة رسول الله صلى الله عليه وسلم في فلسطين ويعملوا أي حجج لأعمال حفر فيها عشان يعني عشان يؤذونا يعني مايحترموش حرمة حي ولا ميت رضي الله عن صحابة رسول الله صلى الله عليه وسلم أجمعين.

الواحد من الأخبار اللي بيسمعتها في الواقع إحنا جينا في زمن صعب يا شباب، إحنا جينا في زمن صعب يا إخواني جينا في زمن صعب قوي الزمن ده يا نبقي رجالة، يا نبقي أبطال نشيل دين الله سبحانه وتعالى وقدامنا فرصة بدر تاني وفرصة أحد تاني وفرصة التضحيات اللي صحابة رسول الله - صلى الله عليه وسلم - ضحوا بيها مع النبي عليه الصلاة والسلام تاني، يا إما يا جماعة هيبقى موقفنا أمام الله رهيب، هيبقى موقفنا أمام الله فظيع، إنت مش مخير تشيل الدين ولا ماتشيلوش، إنت مش مخيرة تبقي جند من جنود ربنا في الأرض ولا ماتبقيش، إحنا مش مخيرين يا جماعة.

معصية خطيرة جدًا

هندخل في موضوع حلقة الليلة افتح لي قلبك، زي ما قلت لكم كل مرة هنمسك معصية وزى ما قلت لكم ترتيب الحلقة بإذن الله سبحانه وتعالى أنا هأتكلم عن معصية، الأول نحاول نحارب معصية، نحاول نحارب عقبة من العقبات اللي بين أي حد من المجتمع وبين ربنا، مش شرط عقبة عند الشباب بس ممكن عند الآباء، ممكن عند الكبار، ممكن عند الأغنياء زي النهارده، زي حلقة النهارده، النهارده يا إخواني وبعد كده أستقبل اتصالاتكم أفتح لكم قلبي في معصية من المعاصي وبعد كده تفتحوا لي قلوبكم يا جماعة في قصص التوبة والتجارب والمشاكل بإذن الله.

معصية النهارده يا جماعة معصية رهيبية يا إخواني، معصية تحرق القلب، معصية ممكن ماتهمش الشباب اللي لسه ما تخرجش لأنه لسه ما اشتغلش وماكسبش ولكن يا جماعة المعصية دي مدمرة المجتمع بتاعنا، يا إخواني المعصية اللي عايز أتكلم عنها النهارده مش معصية عادية دي كبيرة بل مش كبيرة دي من أكبر الكبائر، ده تضييع ركن من أركان ديننا في الأرض، إذا كنا ضيعنا أركان ديننا ربنا هيقم ديننا في الأرض إزاي يا إخواني على إدينا؟

يا جماعة هنتكلم عن معصية خطيرة، أحد إخواني كان قاعد مع واحد غني جدًا وهو بيتكلم معاه بيحسب زكاة ماله فيقول له خرجنا دي ودي وده مش عليه زكاة وده كذا، فبقي ٤٠ مليون جنيه عليهم زكاة قال له يعني الزكاة بتاعتهم أد إيه؟ قال له مليون جنيه.. قال له مليون جنيه؟! هاخرج لربنا مليون جنيه!

ده إنت ربنا اللي إداك الأربعين مليون، إيه البخل ده يا أمة محمد.

في رقبة مين؟

منع الزكاة، يا جماعة الفقير بيفرق معاه خمسين جنيه وعشرين جنيه وعشرة جنيه، يا إخواني الأغنياء لو طلّعوا زكاتهم مش هيفضل فقير في المجتمع اللي بنشوفهم بياكلوا في الزبالة الفجر واحنا نازلين وبيجيبيوا الأكل من الزبالة، يا جماعة المنظر ده هيفتني لو دفعوا زكاة أموالهم، المنظر لما رُحِت أزور أسرة فقيرة لقيت إن هم قَلّوا واحد - قَلّوا واحد ليه؟ بأسأل اللي كانوا معايا قالوا لي لأنه انتحر.. انتحر من الفقر بعد موت الأب من الفقر اللي العيله فيه انتحر والعياذ بالله ده في رقبة مين؟ في رقبة مين؟

المرأة اللي راحت لجمعية خيرية واحد من الأغنياء دخل مع صاحبة الجمعية قال لها كل فقير يدخل لي هنسأله إنت نفسك في إيه؟ وهأعمل له اللي هو نفسه فيه، فدخلت امرأة بيقول لها نفسك في إيه؟ قالت له نفسي في فرخة أعملها شوربة عشان أمي - أمها الكبيرة الغلبانة المريضة - نفسي في فرخة، المنظر اللي بنشوفه دلوقت بتوع بيأعين الفراخ بقوا بيبيعوا رجلين الفراخ بالكيلو، ده مين اللي بيشتريها؟ وبيشتروها ليه؟ ومين اللي يقدر؟ يا إخواني في رقبة مين هذا الفقر اللي وصلنا إليه؟ في رقبة مين؟ في رقبة مين الفقر اللي وصل إليه المجتمع؟

أحد إخواننا كان في جمعية خيرية والنساء ملمومين عشان ياخدوا المعونات بتاعتهم - ربنا يعني الجميع يارب - عشان ياخدوا المعونات بتاعتهم فسمع اتنين ستات بيتكلموا مع بعض واحدة بتقول للتانية أنا ولادي مقطعي عايزيني أعمل لهم بطاطس محمرة، طيب هي مشكلتها إيه؟

مشكلتها في الزيت مشكلتها في تمن إزارة الزيت اللي هتعمل لهم البطاطس المحمرة بيها قالت لها لأ دي بسيطة خالص - بسيطة إزاي - قالت لها بتاع الطعمية بعد ما بيقلي الطعمية طول اليوم بالزيت بيفضل الزيت - الأسود ده اللي بييجب سرطان ده، ربنا يعافينا ويعافي المسلمين جميعاً - هتروحي تاخدي منه شويه أنا بأشترتهم منه وبأحط نقطتين على الرز ونقطتين على الأكل عشان الصدى اللي فيه يروح.

في رقبة مين الفقر اللي فيه ناس وصلت ليه؟ في رقبة مين الحرمان اللي فيه ناس وصلت ليه؟

رغم إن أغنياء أمة محمد لو دفعوا زكاتهم مافيش فقر هيفضل في الأمة، مافيش فقر، أنا عايز أقول لك الليلة أنا عايز أقول لك يا تارك الزكاة أنا عايز أقول لك يا تاركة الزكاة، أنا كمان تاركة الزكاة ليه؟ ده جوزي اللي غني ماعندكيش ذهب بـ ٥٠٠ ماعندكيش ذهب بـ ٢٠٠، بـ ٣٠٠ ألف جنيه؟ ماعندكيش أطقم ذهب في الدولاب؟ ماعندكيش الذهب ده كله اللي عدى النصاب بتاع الذهب.

يا تارك الزكاة مابتطلعش زكاة مالك ليه؟!

مابتطلعش زكاة أطقم الذهب اللي في دولابك ليه؟! عايزة أطقم الذهب دي تبقى أطقم ذهب يحمي عليها في نار جهنم يوم القيامة وتلبسها وهي نار؟ عايزة كل الأطقم دي تلبسها وهي نار والعياذ بالله - ربنا يعافينا جميعاً - يا صاحب الأراضي والأطيان مابتطلعش زكاة الزروع بتاعتك ليه؟!، يا صاحب البهائم والجمال والغنم والأبقار مابتطلعش زكاة السوائم بتاعتك ليه؟!

يا جماعة يا أصحاب المعارض التجارية، يا تجار أمة محمد، يا أغنياء، يا أثرياء، يا كل واحد عدى النصاب في ماله مابتطلعش ليه!؟.

الدنيا فرص كثير لكن الآخرة فرصة واحدة

الحوار اللي بلغني أحد المليارديرات كان قاعد في برنامج من البرامج والمذيع بيقول له إنت بقيت غني إزاي؟ أنا عايز أعرف، الراجل طلع دفتر الشيكات قال له خد.. خد شيك اكتب فيه اللي إنت عايزه، المبلغ اللي إنت عايزه، المذيع ارتبك واتوتر ماعرفش يتعامل مع الموقف، الراجل خد دفتر الشيكات تاني قال له شوف أنا لو كنت زيك كده عمري ما كنت بقيت غني - طبعًا ده في ظنه يعني - ولكن أنا بقيت غني لإني لو كنت مكانك كنت كتبت الشيك ده وكنت انتهرت الفرصة - الحياة فرص - الحياة فرص يا ابني، يا جماعة هي دي الكلمة اللي الواحد اسحضرها من القصة.. الحياة فرص، الدنيا فرص كثير بس الآخرة فرصة واحدة، الآخرة فرصة واحدة، **إنت أخذت عمر واحد، إنت أخذت عمر واحد.**

لما أمسك كتاب البخاري - صحيح البخاري - أقول يا رب الكتاب ده أنا ماخدتش غير عمر واحد عشان أطبقه فيه، كل حديث فيه راح عليّ، أنا يا رب خلاص مش هأجيب عمر تاني أطبقه فيه، أنا اللي ألحق أعمله في عمري ده أعمله هنفذ إمتي؟

يا تارك الزكاة أنا عايز أعرفك النهارده بسبب إنك بخلت بـ ٢,٥% من فلوسك هتخسر إيه في الدنيا؟ هتخسر إيه يوم القيامة؟ هتخسر إيه لما هتيجي تُعاقب على الجريمة اللي إنت عملتها؟ لما تيجي تُعاقب على الجريمة اللي إنت عملتها.

أنا بأكلم مين؟

أنا بأكلم الأغنياء اللي عدّوا النصاب وبأكلم كمان ابني الغني، وبنتي الغنية اللي أمها عندها أطقم الذهب، اللي أبوه عنده الأطيان وعنده الزراعة وعنده الفلوس، أنا بأكلم كل واحد يقدر يوصل صوته لحد يا جماعة، يا إخواني احنا كل المجتمع معاقب بسبب ترك الزكاة ومنع الزكاة من معظم الأغنياء.

في المجتمع تلاقي غني يقول لك أنا بأطلع والله كثير بس، بتطلع كثير! ده إنت زي ما بتحاسب الناس بالشلن إنت تحسب زكاتك بالشلن، يعني إيه تطلع كثير؟ ده إنت تعمل محاسب للزكاة بتاعتك، بس إحنا دلوقت في رمضان يا جماعة يعني موسم تطليح الزكاة يعني لازم نتكلم عن الزكاة دلوقت، لازم نتكلم عن هذه المعصية الخطيرة اللي من أسباب تدمير المجتمع زيها زي الزنا، ده الأشد من الزنا، ده ترك ركن من أركان الدين يا إخواني، ترك ركن من أركان الدين.

عشان كده عايز أتكلم دلوقت، عايز أتكلم يا تارك الزكاة إنت عارف إنت بسبب ال ٢,٥% من فلوسك خسرت إيه في دنيتك؟ في دنيتك!

شوف هتخسر إيه في دنيتك وأخرتك

فيه تاجر معروف، يمكن تاجر كثير في وكالة البلح يعرفوه ويفتكروه، تاجر معروف وغني، وكان رافض يطّلع زكاة ماله يمكن اتشهر وسط التجار برفض تطليح زكاة المال، اتنصح في مسألة زكاة المال مراضاش يطّلع، ربنا أمهله سنة، اتنين، ثلاثة، أربعة، هذا التاجر الآن هذا التاجر الآن عايش على المعونات من الناس.

يا جماعة يعني إنت يا راجل الأعمال الكبير ولا إنت ياللي عندك أطقم الذهب إنت ممكن تخسري كل أطقم الذهب بتاعتك، إنت ممكن تخسر كل فلوسك، مابتطلعش زكاه ليه؟

أنا أعرف ناس يا جماعة عندها مئات الملايين مابتطلعش زكاة، مئات الملايين، أقاربهم فقراء، فقراء فقر مدقع مابتطلعوش زكاة، ناس أغنياء واحدة زكاتها ٢٥ ألف جنيه على المليون اللي عندها تقول خمسة وعشرين ألف جنيه كل سنة!

" **سَيَطُوفُونَ مَا بَجَلُوا بِهِ يَوْمَ الْقِيَامَةِ** " آل عمران: ١٨٠ " **سَيَطُوفُونَ** " فلوسك دي هتبقى طوق من نار، طوق من نار يبقى حوالين رقبتك خمسين ألف سنة - خمسين ألف سنة طول يوم القيامة - " **سَيَطُوفُونَ مَا بَجَلُوا بِهِ** " إنت بخلتي، الفلوس بتاعتك دي مش بتاعتك أصلاً، الـ ٢,٥% دول مش بتوعك، دول بتوع الفقراء، دول بتوع الفقراء من أقاربك، والفقراء من قريتك، والفقراء من جيرانك.

الـ ٢,٥% دول مش بتوعك، لما ماطلعتهمش بقوا سم سمّ فلوسك بقت فلوسك مال حرام، بقيت بتأكل ولادك حرام وبتشرب من حرام، لو نقطة دم حرام دخلت كبدك ماتعرفش هتخرج بعد ما يحصل إيه؟ لو نقطة دم حرام دخلت في جسمك حد من ولادك ماتعرفش هتخرج بعد ما هتعمل إيه؟

إلا المال الحرام، كفاية حديث رسول الله - صلى الله عليه وسلم - " **كل جسد نبت من سحت فالنار أولى به** " صححه الألباني إنت ٢,٥% من مالك ماضت تديهم لأصحابهم - لإن دي مش فلوسك أصلاً - المال كله اتسمم وبقي حرام، " **كل جسد نبت من سحت فالنار أولى به** ".

عايز ولادك يتحرقوا في جهنم؟ إنت عايز نضحى بقضية جهنم كده بكل بساطة عشان ٢,٥% من كل الفلوس اللي ربنا إدهالك؟ ده غير إن معظم ثروة الأغنياء بتبقى معلهاش زكاة أصلاً معلهاش زكاة.

إخواني في الله **قارون.. افتركوا قارون يا أغنياء** يا أغنياء أمة محمد أنا خايف عليكم والله، أنا هاخذ حاجة من الزكاة دي؟ ولا هاعرف إنتو عتطلعوها لمن بس أنا خايف عليكم أشد من عاطفة إن الفقير يشبع إن إنت متتشواش في جهنم يوم القيامة، إن فلوسك ماتبقاش نار تتعذب بيها إنت يوم القيامة، إن فلوسك ماتبقاش تابوت جمر يتقفل عليك يوم القيامة، يا إخواني قارون ربنا آتاه " **مِنَ الْكُنُوزِ مَا إِنَّ مَفَاتِحَهُ لَتَنُوءُ بِالْعُصْبَةِ أُولَى الْقُوَّةِ** " القصص: ٧٦ يعني الإستوديو اللي أنا فيه ده لو إتخط فيه زرم دولارات أعتقد هيقوا كام مليار، والمفتاح بتاعه حته مفتاح أد كده تخيل بقى اللي مفاتيحه الرجالة ماتقدرش تشيلها كان فلوسه أد إيه؟

فلوسك أد إيه يعني؟ ولما مرضاش يدي لربنا حقه ولما مرضاش يعطي لله حقه حصل إيه؟ " **فَحَسَفْنَا بِهِ وَبَدَارِهِ الْأَرْضَ**

" القصص : ٨١

هوّ وفلوسه أحسن او عوا تفتكروا إن ربنا كان محتاج فلوس قارون! ربنا خسف بيه وبخزايينه وبفلوسه الأرض عشان ربنا يقول لنا فلوسه ولا شيء ولا كان ربنا محتاج فلوسه، ربنا كان يريد العبودية من قلبه ولكن ربنا لا يحتاج لشيء ربنا هيغنى الفقراء من غيرك، وهيغنى المحتاجين من قرايبك من غيرك، إنت اللي هتندم، الفقراء اللي كان لازم تطلع لهم زكاتك هيعيشوا فقراء ويموتوا في الدنيا ولكن يوم القيامة هيشتبعوا وهيرغدوا، إنت اللي هتجوع جوع رهيب يوم القيامة، إنت اللي هتتحرم.

خاف على أبوك لو مابطلعش زكاة، خاف على والدتك لو مابطلعش زكاة، خاف على قريبك لو مابطلعش زكاة. يا أمة محمد.. يا أمة محمد، العصاة في رقبة مين؟ يا أمة محمد عايزين نعمل حملة حرب على المعاصي حرب على كبيرة من الكبائر اللي انتشرت في المجتمع بتاعنا.

شوف هتكسب إيه لما تطلع الزكاة

طيب إنت بسبب ٢,٥% من فلوسك ممكن تكسب إيه ممكن تكسب إيه؟ كان أحد الناس كان عنده أراضي زراعية في الصعيد بقي والأراضي بتبقى كبيرة، وحت سنة من السنين وكان الراجل ده بيطلع الزكاة، الوحيد وسط كل الأراضي أيام ما كانت الخمسينات والستينات ما حدش بيطلع زكاة كان لسه في أمية دينية، الحمد لله الذي عافانا في هذه الأيام على ما نحن فيه من بلاء اللهم لك الحمد.

فمن خمسين ستين سنة يا إخواني جه دود نهش الأراضي الزراعية يعني حدثنا ثقة ثقة من أهل الفضل والصلاح بيقول الأرض بتاعة الراجل ده لا يمكن دودة تدخل فيها، لدرجة كان يكبشوا الدود من الأراضي التانية يحطوه في أرضه لا يمكن الدود كأن الدود بيفرّ من الأرض بتاعته، كان الأرض دي في حفظ الله.

فلوسك هتبقى في حفظ الله، ذهبك هيبقى في حفظ الله، أطيانك هتبقى في حفظ الله، تجارتك هتبقى في حفظ الله مش في حفظك إنت، لما تدي لربنا الـ ٢,٥، لما تدي للفقير ٢,٥% من أموالك الأثر غير إن فيه جنة اسمها جنة الصدقة، جنة الصدقة يا جماعة في الشريعة اللي هي الزكاة والصدقة الإيتين يعني انت دلوقت ٢,٥% تشتري بيهم جنة عرضها السماوات والأرض ٢,٥%، من فلوسك اللي هتبقى كام يعني! هتشتري جنة عرضها السماوات والأرض يا بلاش.. يا بلاش.

يا جماعة يا سلام، يا سلام والله يا إخواني الواحد دلوقت لأول مرة أحس إن أنا نفسي بيقى عندي فلوس ويطلع لها زكاة سبحان الله العظيم، بيقى الواحد بيأدي عبادة بباب في الجنة سبحان الله يا بخت الأغنياء لو عقلوا، يا بخت الأغنياء لو فقهوا يا بخت اللي ربنا آتاهم مال، والله يا إخواني والله يبقوا مع النبي وأبو بكر الصديق في الجنة بإذن الله

لو ابتغوا ربنا بأموالهم ده هي والله يا إخواني، ولو ما ابتغوش ربنا بأموالهم يا ويلهم، يا ندمهم لما تتحرم من جنة عرضها السماوات والأرض عشان ٢,٥% من فلوسك، عشان ٢,٥% من فلوسك يا تارك الزكاة، يا تاركة الزكاة، ياللي بخلتوا بالزكاة يحصل إيه يوم القيامة؟

احترس.. شوف هيجصل إيه يوم القيامة؟

اسمع حديث رسول الله صلى الله عليه وسلم وقيل ما أتكلم بقى تقول لي يا عم إنت جايب أحاديث صحيح الجامع، اسمع أحاديث رسول الله صلى الله عليه وسلم في البخاري ومسلم قال رسول الله قول صلى الله عليه وسلم قولي صلى الله عليه وسلم "من آتاه الله مالاً، فلم يؤد زكاته، مُثِّل له يوم القيامة شجاعاً أقرع، له زبيبتان، يطوقه يوم القيامة، ثم يأخذ بلهزمتيه، يعني شذقيه، ثم يقول: أنا مالك، أنا كنزك" صحيح البخاري

دهبك وأتقم الذهب اللي في الدولار، فلوسك، رصيدك، أموالك، أطيانك- من آتاه الله مالاً فلم يؤد زكاته- مارضيتيش تطلعي فلوس مالك طيب شوفي يوم القيامة بقى الذهب اللي إنت بخلافة بزكاته هيجصل فيه إيه؟ شوف بقى فلوسك هيجصل فيها إيه؟

"مُثِّل له ماله يوم القيامة شجاعاً" شجاع اللي هو التعبان بس فيه أنواع من التعبان رهيبه يا جماعة فيه نوع من التعابين في اليمن اسمه الأبتز بيطير بيطير من الجبال، يطير يشق واحد والعياذ بالله.

فيه تعابين رهيبه ربنا يعافينا ده بقى اسمه الشجاع، الشجاع ده في الدنيا اللي هو التعبان اللي يقف في وش فارس راكب على خيل وينفث السم في وجهه مايهموش، الشجاع الأقرع قال لك أقرع يعني راسه مسلوخة الجلد من كتر السم اللي في جسمه.

وقال لك أقرع يعني تعبان لسه شاب التعبان لما بيكبر ممكن يطلع له شعر على رأسه لبي يعرف يعني أحوال التعابين وتكوينهم وكده، ولكن قال لك التعبان اللي أقرع ده ممكن يبقى لسه شاب تعبان بقوته- "شجاعاً أقرع له زبيبتان" يا إما نقطتين سود بين عينيه، يا إما نايبين عشان يغرهم في اللهزمتين بتوع تارك الزكاة "ثم يأخذ بلهزمتيه" يعني إيه؟ شفت قبل كده فيلم عن الافتراس؟ شفت قبل كده أسد بيفترس غزالة بيعمل إيه؟ يقوم جايب بقه ياخذ بالحتتين العضميتين دول في رقبتها ويقوم عاضد بأنيابه عليها هتا دول اللهزمتين اللي عندهم العضلة اللي هي أقوى عضلة في الجسم كله عضلات بتاعة المضغ بقى يعني اللي هي أقوى.

لإن كان يياكل مال اليتيم ومال الفقير يمضغه وياكله فياخذ بالحتتين دول زي منظر افتراس وحش يعني فلوسك تتحول وحش يعني فلوسك تتحول وحش مفترس يفترسك يوم القيامة.

ده في صحيح مسلم إن الثعبان ده هو كمان ممكن يفترس جزء جزء من جسم تارك الزكاة والعياذ بالله- "ثم يأخذ بلهزمتيه" يقوم مفترسه "ويقول له أنا مالك، أنا كنزك"- أنا الفلوس اللي بخلت بيها، أنا الأموال اللي بخلت بيها

٢,٥% يا أغنياء، ٢,٥% بجنة عرضها السماوات والأرض، ٢,٥% من نجاة من هذا الوحش يوم القيامة، ٢,٥% من نجاة من هذا العذاب، ٢,٥% من نجاة من كبيرة من أعظم الكبائر في الدين.

يا إخواني يا إخواني أبو بكر حارب مانعي الزكاة، أبو بكر رفع سيفه أول حرب في الإسلام بعد موت النبي عليه الصلاة والسلام كانت مع مانعي الزكاة قبل الفرس والروم مع مانعي الزكاة يعني دماء صحابة سالت عشان مانعي الزكاة يعني أبو بكر لو عايش النهارده هيرفع السيف عليك، يعني عمر بن الخطاب لو عايش النهارده هيحاربك بالسيف حرب يعني إيه؟ يعني يوم القيامة ماتحلمش إنك تبقى مع أبو بكر في الجنة هتبقى معاه ازاي؟ ده يجاربك، ده أبو بكر لو في الدنيا كان رفع السيف عليك، أmaal بقى يوم القيامة يعمل فيك إيه ويبقى معاك ازاي؟ تبقى ازاي مع عمر بن الخطاب؟

ليه تضيع ركن من أركان الدين

القضية خطيرة جداً يا جماعة الرسول عليه الصلاة والسلام في حديث روي عن النبي عليه الصلاة والسلام وللأمانة العلمية في صيغته أو في سنده بعض الضعف أن رجلاً أتى لرسول الله صلى الله عليه وسلم فقال له: يا رسول الله إني جئت أبايعك على الإسلام ولكن لي شرطين أنا لا عايز أدفع صدقة يعني زكاة ولا أجاهد، فالرسول عليه الصلاة والسلام مادد له إيده كده والراجل جاي يمد إيده بقى وداخل، الرسول سحب إيده قال له "لا صدقة ولا جهاد فبم تدخل الجنة" لا صدقة ولا جهاد فبم تدخل الجنة؟!

هتدخل الجنة بيايه إذا كان لا صدقة ولا جهاد يعني الرسول عليه الصلاة والسلام تطيقي إن يتسحب إيد النبي عليه الصلاة والسلام مايسلمش عليك؟ مايمدش إيده ليك عليه الصلاة والسلام.

ركن من الأركان الخمسة للدين يا جماعة إنت مضيع ركن من أركان دينك الخمسة عشان كده يا جماعة شوفوا الحديث الخطير بتاع النبي عليه الصلاة والسلام "ما من صاحب كنز لا يؤدي زكاته إلا أحمي عليه في نار جهنم فيجعل صفائح" تتعمل صفائح معدنية كده "فيكوى بها جنباه وجبينه حتى يحكم الله بين عباده في يوم كان مقداره خمسين ألف سنة، ثم يرى سبيله إما إلى الجنة وإما إلى النار، وما من صاحب إبل لا يؤدي زكاتها" مايبطلعش زكاة الإبل اللي عنده. "إلا بطح لها بقاع قرقر، كأوفر ما كانت تستن عليه كلما مضى عليه آخراها ردت عليه أولها حتى يحكم الله بين عباده في يوم كان مقداره خمسين ألف سنة، ثم يرى سبيله إما إلى الجنة وإما إلى النار، وما من صاحب غنم لا يؤدي زكاتها إلا بطح لها بقاع قرقر كأوفر ما كانت فتطوّه بأظلافها وتنطحه بقرونها" تفضل تدوس عليه الإبل بتاعة فلوسك تتحول وحوش، وحوش تعض وتتطأ فيك يوم القيامة "ليس فيها عقصاء ولا جلداء كلما مضى عليه آخراها ردت عليه أولها حتى يحكم الله بين عباده في يوم كان مقداره خمسين ألف سنة مما تعدون ثم يرى سبيله إما إلى الجنة وإما إلى النار"

صحيح مسلم

يعنى إيه يا جماعة يعني خمسين ألف سنة عذاب يوم القيامة بسبب ترك الزكاة، يعني أنا ماسمعتش الرسول عليه الصلاة والسلام قال فيه إن خمسين ألف سنة عذاب مستمر يوم القيامة غير الحديث ده هو قد يكون يعني سبحان الله **"وَمَا أُوتِيتُمْ مِنَ الْعِلْمِ إِلَّا قَلِيلًا"** الإسراء: ٨٥

إنما يا جماعة الموضوع خطير، غير النار يا جماعة، غير قول الله، أنا بأحذرك من قول الله عشان ٢,٥% من مالك تعرّضى نفسك للآية دي، عشان ٢,٥% من فلوس الله من مال الله في مالك تعرّض نفسك للآية دي **"يَوْمَ يُحْمَى عَلَيْهَا فِي نَارِ جَهَنَّمَ فَتُكْوَى بِهَا جِبَاهُهُمْ وَجُنُوبُهُمْ"** التوبة: ٣٥

يعنى المال ده يتحمى عليه في النار خمسين ألف سنة وبعد كده يتكوى بيه من الجباه والجنوب والظهور والعياذ بالله لما كان يعرض عن الفقير، لما كان يدي له ضهره والعياذ بالله ربنا يعافينا يا جماعة تصدقوا يا جماعة تصدقوا يا إخوان أبو ذر داخل على النبي عليه الصلاة والسلام والنبي يقول **"هم الأخسرون ورب الكعبة هم الأخسرون ورب الكعبة"** قال له يا رسول الله من يا رسول الله؟ أبو ذر إترعب _ قال له: **"الأكثرين أموالاً، إلا من قال بماله هكذا وهكذا"** صحيح البخاري

اللي طلّع فلوس لله، اللي أدى الزكاة يمين وشمال وورا الرسول ما قالش قدام لأن قدام ده إنت مش عايز تشوف اللي إنت طلعتة، إنت خلاص طلعتة ونسيتته وانطلقت إلى الله سبحانه وتعالى.

يا جماعة القضية في غاية الخطورة **"يَوْمَ يُحْمَى عَلَيْهَا"** يحمى إحماء في جهنم **"يَوْمَ يُحْمَى عَلَيْهَا فِي نَارِ جَهَنَّمَ فَتُكْوَى بِهَا جِبَاهُهُمْ وَجُنُوبُهُمْ وَظُهُورُهُمْ هَذَا مَا كُنْتُمْ لَأَنْفُسِكُمْ فَذُوقُوا مَا كُنْتُمْ تَكْتُمُونَ"** التوبة: ٣٥

والعياذ بالله كوي، الرسول عليه الصلاة والسلام في حديث تاني يا تارك الزكاة يقول إن الكوي ده يكوى من ظهره فينفذ إلى جنبه والعياذ بالله، ويكوى من قفاه فينفذ إلى جبهته والعياذ بالله، كوي، كوي والعياذ بالله. **"لما دخلت امرأتين على النبي عليه الصلاة والسلام معاهم أساور فقال: "أتؤديان زكاته؟ قالتا: لا فقال لهما رسول الله: أتجبان أن يسوركما الله بسوارين من نار؟ قالتا: لا - يعني يمكن ماكانوش يعرفوا - قال: فأديا زكاته" حسنه الألباني** والعياذ بالله عايزة أطقم الذهب بتاعتك دي تبقى نار يوم القيامة؟ عايزها تبقى نار يوم القيامة؟

يا جماعة القضية في غاية الخطورة، يا جماعة القضية في غاية الخطورة، يا تارك الزكاة، يا تارك الزكاة كل ده عشان ٢,٥% من مالك! الحديث اللي يقطع قلبك يا تاركة الزكاة، الحديث اللي يقطع قلبك، يا كل واحد له قريب تارك الزكاة كلّمه، كلّمه لوجه الله سبحانه وتعالى ربنا يعيننا على النهي عن المنكر يارب اللهم آمين ويهدى بنا الناس أجمعين. **جاي تندم بعد إيه؟**

الحديث الخطير يا جماعة حديث الحوض حوض النبي عليه الصلاة والسلام **"فلا أعرفن أحدكم يأتي يوم القيامة يحمل بعيرا له رغاء"** عامل شاة والشاة قاعدة لسه بتأمأ ولسه يحمل شاه مرضاش يطلّع زكاتها شاييل الأموال اللي مرضاش يطلّع زكاتها على كتفه.

"فلا أعرفن أحدكم يأتي يوم القيامة يحمل بعيراً له رغاء فينادي: يا محمد يا محمد! فأقول: لا أملك لك شيئاً، قد بلغت" مالقاش ملاذ يوم القيامة غير إنه يجري على النبي عليه الصلاة والسلام من عاقبة تارك الزكاة "يا محمد يا محمد! فأقول: لا أملك لك شيئاً، قد بلغت" صححه الألباني

العلماء قالوا في شرح الحديث ده قال لك يعني الرجل ده يا إخواني الرجل ده لا أملك لك شيئاً يعني الرجل ده هالك والعياذ بالله أغثني يا رسول الله، انقذني يا رسول الله جاي تشيل بعد إيه؟ وجاي تندم على ترك الزكاة بعد إيه؟ كان ٢,٥% من فلوسك ينجوك من العذاب دا هو كله كان ٢,٥% من فلوسك ينجوكي من العذاب دا هو كله

ده هيبقى حالك ساعة الميزان يا تارك الزكاة

الشيء الرهيب بقى في تارك الزكاة ساعة الميزان يا جماعة ساعة مايجي يتوزن أعماله يلاقي الميزان بتاعه قاعد يتحط فيه كمية كبائر فظيعة فظيعة، أنا عملت إيه يارب، زنا! أنا مازنيتش يارب، مخدرات! أنا ماشربتش يارب، بغاء! يارب أنا مالي بالبغاء والعياذ بالله والحاجات دي قتل! أنا يارب ماقتلتش، انتحار! أنا يارب مت على سريري أنا ما انتحرتش! يارب يارب كل الكبائر دي ملايين الكبائر دي أنا مالي بيها يارب سبحان الله العظيم كل فقير كل فقير في الأمة وقع في كبيرة من الكبائر بسبب الفقر هو معاقب، والغني اللي كان عليه يديله الزكاة معاقب، كل واحدة المرأة اللي راحت بتلاتة جنبه يا جماعة تبيع عرضها، بتلاتة جنبه عشان تنفق على بيتها تلاتة جنبه دي في رقية مين هذه المرأة؟ زنا كام شاب لأنه مش لاقى يتجوز، لأن الأغنياء مادولوش لأنه فقير، كام شاب يا جماعة وقع في الزنا لأنه مش لاقى يتجوز، كام يا جماعة واحد قتل بسبب الفقر؟ كام واحد انتحري اللي قلت لكم قصته النهارده بسبب الفقر؟ كام واحد وقع في الزنا بسبب الفقر لأنه مش لاقى يتجوز؟ كام واحد يا جماعة؟ كام واحد سرق بسبب الفقر؟ كام شاب باع مخدرات بسبب الفقر؟ يا جماعة كام؟ معانا اتصال يا إخواني معانا اتصال بإذن الله..

رسالة من الله

المتصل: السلام عليكم دكتور حازم

الشيخ حازم: وعليكم السلام ورحمة الله وبركاته أهلاً وسهلاً إزيك يا أخي

المتصل ربنا يبارك فيك ويعمل عملك في ميزان حسناتك

الشيخ حازم: وفيكم بارك الله اتفضل يا أخي

المتصل: أنا عبد الله موزع موسيقي وعندي استوديو تسجيلات أغاني موسيقي ومعازف وكده فحضرتك ربنا كرمي

دكتور حازم: ربنا يتوب علينا جميعاً يا أخي اتفضل افتح لنا قلبك ربنا يبارك فيك

المتصل: ربنا يبارك فيك أنا التزمت من شهور قريبة وربنا كرمي الحمد لله رب العالمين، ربنا بعث لي رسالة معينة بوفاة

حد قريب متي يعني فرنا كرمي والتزمت، وطبعاً عرفت إن العمل ده حرام والموسيقي حرام وربنا يتوب علينا وأنا عايز

نصيحة من حضرتك وأنا فعلاً بأبحث عن عمل في المجال الإسلامي وكده وربنا يكرمنا إن شاء الله.

دكتور حازم: ربنا يبارك فيك ربنا يبارك فيك يا أخ عبد الله إنت ربنا بعث لك رسالة ربانية جت لك في البريد بتاعك إن موت حدّ تعرفه أو موت حبيب، عبد الله إنت عارف موتات المغنين كان شكلها إيه؟ إنت عارف وإحنا لسه جاين من على الطريق السريع واحد قال لي فلان الفلاني كان مغني مشهور جدّا قال لي مات في الحته دي سبحان الله العظيم، وكان رايح حفلة في القاهرة سبحان الله العظيم.

إنت عارف يا حبيب قلبي إنت ربنا بعث لك رسالة والحمد لله إنك خدت الخطوة دي والحمد لله إنك مُعترف بينك وبين الله سبحانه وتعالى ولكن عبد الله إحنا عايزين بقى ناخذ خطوة لقدام، إنت عايز تاخذ قرار ما تخافش من ربنا يا حبيب قلبي أنا لو عند العمار دهية أنا لو عندي عمارة كبيرة أنا ماقدرش أديك شقة، طيب ربنا اللي عنده الدنيا دي كلها مايقدرش يديك؟ مايقدرش يرزقك؟ مايقدرش يفتح عليك؟ المال الحرام ده لنا وقفة معاه إن شاء الله لأن المال الحرام والعياذ بالله حتى شباب الجامعة بقوا بيدخلوا أي سكة تجيب أي مال حرام، المال الحرام دمر المجتمع يا إخواني فيا عبد الله خطوة جميلة وربنا يبارك فيك وإنت فتحت لنا قلبك واتكلمت بصراحة وبصدق ربنا يجعلك من الصادقين.

نصيحة بالابتعاد عن الموسيقى والعلماء المضللين

المتصل: ممكن أوجه رسالة لكل اللي في مجال الموسيقى ولآبائنا وأمهاتنا حتى اللي برّه هذا المجال لإن الأفلام والموسيقى والمسلسلات بقت في معظم بيوتنا، وأي أب ماينصحش أولاده وسايب أولاده يتفرجوا على الأفلام والموسيقى والأفلام فيها عُري وفيها وفيها.

دكتور حازم: ولعب الأطفال فيها موسيقى.

المتصل: والمفروض إن ماחדش ياخذ الفتاوى إلا من العلماء الربانيين والدعاة الصادقين لإن هناك من يدعي أنه من أهل العلم ويقول إن الموسيقى حلال فأرجو من فضيلتك نصيحة لمن يفتي بغير علم.

دكتور حازم: ربنا يبارك فيك يا عبد الله يا حبيب قلبي.

إن شاء الله احنا لنا وقفة يا جماعة سواء مع المعازف إن شاء الله في رمضان أو مع قضية الدعاة اللي بيفتي بأي حاجة ويضيع دين الناس.

مثل من الممثلين يتوب إلى الله يروح لداعية من الدعاة يقول له ارجع تاني، ده جهادك! إنت بتودّيه فين، واحد يخرج من بركة طين وتقول له ارجع تاني؟! نُفاجأ بيه بعد كده في قضية وجواز عرني وفضائح ومشاكل سبحان الله من الذي ضيعه؟ الداعية هو الذي ضيع الناس سبحان الله.

الرسول "صلي الله عليه وسلم" من ألف وربعمئة سنة حذرنا من دعاة على أبواب جهنم، إن شاء الله سيكون لنا وقفة مع هذه القضية برضه في درس "نايت كلب إسلامي" إن شاء الله وإن كان العنوان غريب شوية إلا إن إحنا إن شاء الله هنفهم العنوان كويس لما نيجي نتكلم يا إخواني.

ربنا يتوب عليك يا عبد الله وربنا يتوب على عصاة المسلمين جميعًا ولو عندك أي مطرب، أي ملحن، أي فنان تائب أو غير تائب عايز أقعد معاه إن شاء الله ونتكلم مع بعض ونفتح قلوبنا لبعض أنا تحت أمره إن شاء الله بإذن الله، أي

حد يا إخواني، أي عاصي يا جماعة مش شرط إن يكون عاصي معروف أو غير معروف ولكن المعروفين يكونوا قدوة للشباب، لما يتوب الشباب بيتأثر سبحانه الله العظيم نفسنا ننزل للناس بقى يا جماعة نفسنا ننزل للواقع بقى الواحد أحياناً بيتخفق من كاميرا الفضائيات، أحياناً بأخفق من الكاميرا أنا عايز أنزل للناس يارب أنا عايز أكلم الناس، أنا عايز أنزل للعاصي في المكان بتاعه وأكلمه عن ربنا سبحانه وتعالى.

عايزين يا جماعة يكون قلبنا قوي قوي وإحنا عايزين الأرض كلها تعبد ربنا سبحانه وتعالى يعني المكاملة بتاعة عبد الله باعتباره داخل الوسط الغنائي وداخل وسط المطربين وداخل وسط الممثلين يعني مكاملة تهمنا جدًّا في البرنامج وجزاه الله خيراً إنه فتح لنا قلبه وإن شاء الله يأخذ الخطوة اللي باقيه بإذن الله سبحانه وتعالى.

دلوقت فانوس رمضان فيه أغاني يا جماعة، دلوقت بتاع العصارة مشغل أغاني، المواصلات أغاني، كل حاجة دلوقت سبحانه الله العظيم! المعازف زي الخمور حُرِّمت في الدنيا ولكن حلال في الجنة بأروع ما تكون فنصبر عنها يا إخواني في الدنيا عشان نناها في الجنة إن شاء الله.

إحنا دلوقت مكملين مع قضية تارك الزكاة مع خطورة قضية تارك الزكاة خطورة القضية بتاعة ساعة العرض على الله سبحانه وتعالى وهو داخل يُعرض على الله مش اللي بيُعرض ينظر عن يمينه فلا يرى إلا ماقدّم وينظر عن شماله فلا يرى إلا ما قدّم تخيلوا يا إخواني ينظر عن يمينه يرى الفقراء اللي وقعوا في الكبائر بسببه، ينظر عن شماله يرى الفقراء اللي وقعوا في الكبائر بسببه.

معلش يا إخواني إحنا عايزين نكمل قضية الزكاة بإذن الله سبحانه وتعالى وساعات بأبقى أنا بي شويّه وعايز أفتح قلبي أكثر ما إنتم تفتحوا قلوبكم ولكن معلش إحنا وقت البرنامج بتاعنا ضاق شويه ولكن ركزوا معاً يا إخواني، ركزوا معاً دلوقت، ركز مع قضية ترك الزكاة قضية خطيرة في غاية الخطورة قضية إن إنسان يبجي يوم القيامة يا جماعة في ميزانه والعياذ بالله زنا ومخدرات و... كل ده ليه؟ الفقرا عملوا كده بسبب الفقر وإنت اللي كان معاك الفلوس جريمة كبيرة كل ده بسبب ٢,٥% من فلوسك، يبجي غني من أغنياء مصر في صحيفته نصف كبائر فقراء مصر ليه يارب؟ لأن دول كانوا في رقبته، يبجي غني من أغنياء الخليج في رقبته نصف كبائر أهل الخليج ليه يارب؟ في رقبته، يبجي غني من أغنياء المغرب العربي في رقبته نصف كبائر أهل المغرب العربي، نصف كبائر أهل جنوب السودان ودارفور ليه يارب؟ كانوا في رقبته بسبب ٢,٥%!

ماحدش يبجي يا إخواني يقول لي أنا بأطلع والله والله وأنا بأطلع كثير و... لا يا حبيبي احسب مع ربنا سبحانه وتعالى دي زكاة، ده حق الله، وهو فيه حاجة اسمها أنا أصلي مااعرفش الظهر أربعة بقى ولا خمسة ولا ثلاثة هوّ فيه حاجة اسمها الكلام ده هتقول هو أنتم عايزين من فلوسي إيه؟ دي فلوس ربنا تخاف أحسن ياخذها منك؟

يا جماعة اللي بيزكي ده ربنا اللي بيحفظ له ماله، زكاة يعني بركة هيبارك لك في مالك، زكاة يعني ثناء هينمي لك مالك، زكاة يا جماعة يعني طهارة هيطهر لك مالك وهيطهر لك قلبك.

تدّي زكّاتك لمن؟

لأقاربك جيرانك، أقاربك في القرية، أقاربك الفقراء، الفقراء اللي في القرية، الفقراء اللي من جيرانك اللي إنت تعرفهم من الفقراء، اذّي زكّاتك للدعوة، الجمع الفقهي في مكة المكرمة بالإجماع أفتى بأنه يجوز إخراج الزكاة في الدعوة والعمل لدين الله أَمال الدعوة تنتشر ازاى؟ ودين ربنا يُبلّغ إزاى؟ بالدعوة إلى الله في نشر الدعوة إلى الله، في دعم الدعوة إلى الله بأي صورة من الصور، في توصيل دين ربنا للشباب بأي صورة من الصور.

اذّي فلوسك لغزة، غزة يا إخواني اللي مش عايزين ننساها في رمضان، غزة المحاصرة طلّع زكّاتك لغزة يا أخي، طلّع زكّاتك لغزة يا أخي اذّيها لأي جمعية بتوصل لغزة "هيئة الإغاثة في نقابة الأطباء" أي حاجة بتودّي لغزة يا إخواني ما ننساش إخواننا المجاهدين في رمضان ربنا ينصرهم يارب.

التوصيات

أنا بأكّلم دلوقت كل واحد ما بيطلعش زكّاته وكل واحد أبوه أو أمه أو أحد يقدر يكلمه ويصل له ما بيطلعش زكّاته كالموهم، حذروهم اللي تفتكروه من هذا الكلام قولوه لهم يا إخواني قولوه لهم وحذروهم وكلموهم عن ربنا سبحانه وتعالى.

إخواني في الله إحنا معانا رقم إن شاء الله يعني عملنا رقم ساخن لفتاوى الزكاة لأن اللي عايز يطلّع زكاة زروع أطع على إيه؟ وما أطلعش على محاصيل إيه؟ الذهب أطع كل سنه ولا أطع مرّه في العمر ولا ما أطلعش؟ الديون أطع على الديون اللي لي عند الناس؟ طيب أنا عليّ ديون أطع ولا اسدّد ديوني؟ طيب أنا عندي بضاعة في المحل أطع على البضاعة ولا البضاعة دي تبقى فلوس بعد كده؟

طيب أنا دلوقت أعمل إيه في قضية " **وَأَتُوا حَقَّهُ يَوْمَ حَصَادِهِ** " الأنعام: ١٤١

يا إخواني الأغنياء لو طلّعوا زكّاتهم مش هيفضل في الأمة فقير، كل واحد فقير، كل واحد جعان دلوقت! كل واحد فطر على لقمتين ونفسه في اللي أنت فيه دلوقت، كل واحد المدارس داخله والعيد داخل وهو مش عارف هيجيب لأولاده إيه؟ كل دول في رقبنا يا جماعة في رقبة كل واحد معاه مال وماطلّعش، طلّعوا يا جماعة.

٢,٥% ينقدوا دينك وأخرتك

صهيب الرومي لما ساب ماله في مكة وراح للنبي قال له " **ريح البيع** " في الصحيح المسند، النبي يقول لك على الخوض ربح البيع.

عثمان ابن عفان لما مؤل جيش العسرة النبي قال " **ما ضر عثمان ما عمل بعد اليوم** " حسنه الألباني النبي يقول لك ما ضر ما فعلت بعد اليوم، أبو الدحداح لما طلّع الحديقة النبي قال " **كم من عدقٍ دواح لأبي الدحداح في الجنة** " صححه الألباني

لَمَّا يَقُولُ لَكَ النَّبِيُّ كَمْ مِنْ نَعِيمٍ لَكَ فِي الْجَنَّةِ، كَمْ مِنْ نَعِيمٍ لَكَ فِي الْجَنَّةِ نَطَّلَعَ اللَّهُ يَا إِخْوَانِي الْفَقِيرَ بِيَفْرَقَ مَعَهُ الْخَمْسِينَ جَنِيهِ وَاللَّهُ وَاللَّهُ بِيَفْرَقَ مَعَهُ الْعَشْرِينَ جَنِيهِ وَاللَّهُ الْخَمْسَةَ جَنِيهِ بِيَفْرَقَ مَعَهُ وَبِتَسْعِدُهُ وَتَحُلُّ لَهُ مَشَاكِلَ كَبِيرَةً فِي حَيَاتِهِ إِنَّتَ مَشَّ مَتَخِيلَهَا! الْفَقْرُ صَعْبٌ يَا جَمَاعَةَ الْفَقْرِ صَعْبٌ زِي مَا رَبَّنَا سَمَاهُ الْفَقْرُ يَعْنِي الَّذِي بِيَشَلُّ الْإِنْسَانَ تَمَامًا عَنِ الْحَرَكَةِ.

الرَّقْمُ الْخَيْرِيُّ لِفَتَاوَى الزَّكَاةِ لِي عَاوِزٌ يَسْأَلُ عَنِ فَتَاوَى وَيَعْمَلُ بِهِ وَيَطَّلَعُ زَكَاتِهِ إِزَايَ وَالَّذِي عَاوِزَ يَطَّلَعُهَا أَوَّلَ بِأَوَّلٍ يَنْفَعُ وَلَا لِأُ وَالَّذِي فَاتَ عَلَيْهِ سَنِينَ زَكَاةً يَعْمَلُ فِيهَا إِيهِ؟ الْمَجْلِسُ الْحَسْبِيُّ وَاحِدٌ فَلَوْسُهُ حَاطَتْ إِيْدُهُ عَلَيْهَا لَمَّا يَبْلُغُ سَنَ الرَّشْدِ هِيَعْمَلُ إِيهِ لَمَّا يَأْخُذُ فَلَوْسُهُ مِنَ الْمَجْلِسِ الْحَسْبِيِّ؟

كُلُّ الْفَتَاوَى دِي يَأْذَنُ اللَّهُ عَلَى رَقْمِ ٠١٦٤١٠١٠٠٠ إِنْ شَاءَ اللَّهُ يَأْذَنُ اللَّهُ.

٢,٥% يَنْقُذُوا أُمَّةَ مُحَمَّدٍ، مَا نَضِيْعُشْ نَفْسُنَا عَشَانِ ٢,٥%، ٢,٥% هِيَفْرَقُوا مَعَ الْفَقِيرِ وَهِيَفْرَقُوا مَعَكَ فِي دُنْيَتِكَ وَفِي آخِرَتِكَ وَفِي سَعَادَتِكَ وَفِي صَلَاتِكَ بِاللَّهِ.

بَلِّغُوا هَذِهِ الرِّسَالَةَ لِلْجَمِيعِ يَا جَمَاعَةَ ابْعَثُوا رِسَالِي بِالْمَحْمُولِ لِكُلِّ النَّاسِ، ٢,٥% مِنْ مَالِكَ يَنْقُذُوا دُنْيَتِكَ وَأَخِرَتِكَ أَوْ يَضِيْعُوا دُنْيَتِكَ وَأَخِرَتِكَ.

إِخْوَانِي فِي اللَّهِ إِنْ شَاءَ اللَّهُ مِنْ أَوَّلِ بَكَرِهِ هِنَسْتَكْمَلُ افْتَحْ لِي قَلْبِكَ فِي الْإِتِّجَاهِ الَّذِي إِحْنَا مَاشِيَيْنَ فِيهِ إِنْ إِحْنَا كُلَّ مَرَّةٍ نَتَكَلَّمُ عَنِ مَعْصِيَةِ، كُلَّ مَرَّةٍ هِنْتَعَامَلُ مَعَ مَعْصِيَةِ خَطِيْرَةٍ هِنْتَكَلِمُ عَنْهَا يَا جَمَاعَةَ وَهِنَحَاوُلُ نَحَارِبُهَا بِإِذْنِ اللَّهِ وَبَعْدَ كَدِّهِ فِي نَهَايَةِ الْبَرْنَامِجِ هِنَفْتَحُ اتِّصَالَاتٍ لِأَيِّ لَقِيْتِ إِنْ الْإِتِّصَالَاتِ الْمُنْتَاثِرَةِ عَلَى مَدَى الْبَرْنَامِجِ بِصِرَاحَةٍ يَعْنِي إِيهِ مَا بِنْتَأْدِيْشِ الرِّسَالَةَ بِتَاعَةِ الْبَرْنَامِجِ فَحَلَّتْ هِنَخَلِي الْإِتِّصَالَاتِ فِي فِتْرَةٍ وَالْبَرْنَامِجِ فِي فِتْرَةٍ بِإِذْنِ اللَّهِ سَبْحَانَهُ وَتَعَالَى وَرَبَّنَا يَعِينُنَا وَرَبَّنَا يَثْبِتِكُمْ وَرَبَّنَا يُؤَيِّدِكُمْ بِطَاعَتِهِ وَرَبَّنَا يَمِّنْ عَلَيْنَا بِالْهَدَايَةِ وَيَتُوبَ عَلَيْنَا وَيَكْرُمُنَا بِجَوَارِهِ فِي الْفَرْدُوسِ الْأَعْلَى إِنَّهُ وَلِي ذَلِكَ وَالْقَادِرُ عَلَيْهِ.

دعاء الخاتمة

اللَّهُمَّ تَبَّ عَلَى عَصَاةِ الْمُسْلِمِينَ، اللَّهُمَّ اهِدِ أَغْنِيَاءَ الْمُسْلِمِينَ، اللَّهُمَّ اهِدِ حُكَّامَ الْمُسْلِمِينَ، اللَّهُمَّ اهِدِ فِتْيَاتِ الْمُسْلِمِينَ، اللَّهُمَّ اهِدِ شَبَابَ الْمُسْلِمِينَ، اللَّهُمَّ اهِدِ آبَاءَ وَأُمَّهَاتِ الْمُسْلِمِينَ، اللَّهُمَّ اهِدِ أَطْفَالَ الْمُسْلِمِينَ، اللَّهُمَّ اهِدِ دَعَاةَ الْمُسْلِمِينَ، اللَّهُمَّ أَنْزِلْ هِدَايَتِكَ عَلَى قُلُوبِنَا اللَّيْلَةَ، اللَّهُمَّ اعْتَقْ رِقَابِنَا مِنَ النَّارِ، اللَّهُمَّ إِنَّا يَا رَبَّنَا يَا رَقِيْبِنَا نَتَمَنَّى عَلَيْكَ أَنْ تَسْتَحْدِمَنَا فِي طَاعَتِكَ.

اللهم استعملنا ولا تستبدلنا، اللهم استخدمنا لنصرة دينك، اللهم انصر إخواننا في غزة، اللهم يا ربنا منّ علينا بالهداية، اقبلنا على ما كان منّا، اقبلنا على ما كان منّا، اقبلنا على ما كان منّا، ربنا تقبل منّا إنك أنت السميع العليم، وتب علينا إنك أنت التواب الرحيم.
أقول قولي هذا وأستغفر الله لي ولكم، سبحانك اللهم وبحمدك أشهد ألا إله إلا أنت أستغفرك وأتوب إليك، وصلى الله على نبينا محمد وعلى آله وصحبه وسلم.
وجزاكم الله خيراً.

تم بحمد الله

شاهدوا الدرس للنشر على النت في قسم تفريغ الدروس تفضلوا هنا:

<http://forums.way2allah.com/forumdisplay.php?f=36>